

Mahathir patut kekal sebagai negarawan

SINAR HARIAN

8 JANUARI 2018

MOHD HAFIZ ISMAIL

SHAH ALAM - Pengumuman Pakatan Harapan (Harapan) mencalonkan Tun Dr Mahathir Mohamad sebagai perdana menteri jika mereka menang dalam PRU14 satu kesilapan besar.

Bekas Ketua Angkatan Muda Keadilan (AMK), Datuk Mohamad Ezam Mohd Nor berkata, bekas perdana menteri itu sepatutnya kekal sebagai negarawan dan bersuara menegur kesalahan yang dibuat oleh kerajaan hari ini.

"Saya masih ingat semasa berada di Kementerian Kewangan beberapa bulan sebelum saya meletakkan jawatan, surat terbuka Mahathir mengkritik Datuk Seri Najib Tun Razak (perdana menteri) merupakan serangan paling ditakutinya. Saya sendiri diminta bertindak balas mempertahankan Najib dan menyerang Mahathir namun saya enggan lalu meletakkan jawatan.

"Negara perlukan Mahathir sebagai negarawan dan bukan kembali menjadi ahli politik di negara ini. Negara kita ramai negarawan tetapi jarang pula bersuara membela negara dan rakyat seperti Mahathir. Tindakan Harapan menamakan beliau sebagai calon perdana menteri satu keputusan salah dan kebelakang," katanya dalam satu kenyataan, hari ini.

Beliau mempersoalkan tindakan harapan membiarkan perkara tersebut berlaku dan mendakwa ada agenda tersirat kelompok tertentu dalam gabungan pembangkang itu.

"Saya tidak hairan apabila diberitahu ada agenda tersirat kelompok tertentu dalam Harapan meletakkan Mahathir di situ untuk menidakkan tokoh-tokoh

muda yang berpotensi mendudukinya. Mereka takut tokoh muda ini jika diberi peluang menjadi kepala perang akan menutup peluang mereka di kemudian hari.

"Sekiranya ini benar, ia satu perbuatan khianat kepada perjuangan rakyat. Harapan tidak ketandusan pemimpin muda, Datuk Seri Mohamed Azmin Ali (Timbalan Presiden PKR), Datuk Seri Mukhriz Mahathir (Timbalan Presiden Bersatu), Naib Presiden PKR, Nurul Izzah Anwar dan ramai lagi mampu menggalas perjuangan itu," katanya.

Menurutnya, amat malang disaat negara-negara lain memberikan peluang dan menjulang tokoh muda, masih wujud permainan politik sempit sesetengah pihak yang takut kehilangan kuasa.

"Lebih malang, mereka yang takut hilang kuasa ini adalah daripada kalangan yang menggelarkan diri sebagai pejuang rakyat, reformasi dan progresif.

"Sampai bila rakyat negara ini mahu dinafikan hak mereka mengecapi nikmat perjuangan dan merasai reformasi sebenar?" soalnya.

© 2017 All Rights Reserved • Karang kraf Group Media • © 2017 Hakcipta Terpelihara • Kumpulan Media Karang kraf

Source: <http://www.sinarharian.com.my/politik/mahathir-patut-kekal-sebagai-negarawan-1.780605>